



REPUBLIKA E SHQIPËRISË
AUTORITETI I KONKURENCËS
KOMISIONI KONKURENCËS

Nr. 123/prot.
19

Tiranë, më 19.03.2024

VENDIM

Nr. 1066, Datë 19.03.2024

“MBI AUTORIZIMIN E PËRQENDRIMIT TË REALIZUAR NËPËRMJET KRIJIMIT TË NJË NDËRMARRJE TË PËRBASHKËT ME FUNKSIONE TË PLOTA, PERUTNINA PTUJ ALBANIA SHPK DHE PËRFTIMI I KONTROLLIT NGA KJO E FUNDIT MBI SHOQËRITË DRIZA SHPK, FRESH CHICKEN ALBANIA 2019 SHPK, INDUSTRIA FORAGJERE (VEAF) SHA DHE BIZNESIN E SHOQËRISË EURO ALB 2009 SHPK”

Komisioni i Konkurrencës me pjesëmarrjen e:

Z.	Denar BIBA	Kryetar
Znj.	Leida MATJA	Zv/Kryetar
Znj.	Adriana BERBERI	Anëtar
Znj.	Rezana KONOMI	Anëtar
Z.	Durim KRAJA	Anëtar

Në mbledhjen e tij të datës 19.03.2024, shqyrtoi çështjen me:

Objekti:

Autorizimi i përqendrimit të realizuar nëpërmjet krijimit të një ndërmarrje të përbashkët, me funksione të plota, Perutnina Ptuj Albania SHPK dhe përfitimi i kontrollit nga kjo e fundit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesin e shoqërisë Euro Alb 2009 SHPK.

Baza Ligjore:

Nenet 2, 10-12, neni 24, germa d, dhe nenet 53-64 të ligjit nr. 9121, datë 28.07.2003 “Për mbrojtjen e konkurrencës”; Rregullorja “Për zbatimin e procedurave të përqendrimit të ndërmarrjeve”; Udhëzimi “Mbi kontrollin e përqendrimeve ndërmjet ndërmarrjeve”; Udhëzimi “Për formën e njoftimit të përqendrimit” dhe Formulari i njoftimit të përqendrimit.

Komisioni i Konkurrencës, pas shqyrtimit të relacionit të Sekretarit të Përgjithshëm, si dhe raportit të Drejtorisë së Analizës dhe Metodologjisë së Tregjeve mbi njoftimin e përqendrimit të realizuar nëpërmjet krijimit të një ndërmarrje të përbashkët, me funksione të plota, Perutnina Ptuj

Albania SHPK dhe përfitimi i kontrollit nga kjo e fundit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesin e shoqërisë Euro Alb 2009 SHPK,

VËREN SE :

I. Palët në transaksion dhe procedura

Pranë Autoritetit të Konkurrencës u depozitua njoftimi në lidhje me krijimin e një ndërmarrje të përbashkët / joint – venture, me funksione të plota, Perutnina Ptuj Albania SHPK dhe përfitimi i kontrollit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesit të shoqërisë Euro Alb 2009 SHPK.

Referuar dokumenteve të nënshkuara, palët në transaksion janë:

Pala blerëse: Perutnina Ptuj Albania SHPK do të jetë një ndërmarrje e përbashkët, e cila do të themelohet nga shoqëritë PERUTNINA PTUJ d.o.o. dhe Balfin - Balkan Finance Investment Group SHPK, sipas ligjeve të Republikës së Shqipërisë, në formën e një shoqërie me përgjegjësi të kufizuar. Qëllimi dhe objekti i veprimtarisë së JV do të jetë investimi në industrinë e shpendëve duke blerë në mënyrë strategjike shoqëri, shoqëri në aktivitet dhe asete.

PERUTNINA PTUJ d.o.o. është një shoqëri me përgjegjësi të kufizuar, e themeluar sipas legjislacionit të Sllovenisë. Objekti i shoqërisë është mbarështimi i shpendëve, prodhimi i ushqimit për kafshët, prodhimi i mishit të shpendëve dhe produkteve, tregtia dhe shërbimet.

PERUTNINA PTUJ d.o.o. është pjesë e Grupit Perutnina, i cili është aktiv në shitjen e mishit të shpendëve dhe produkteve të mishit në tregjet vendase ku ka kapacitetet e veta të prodhimit.

Grupi Perutnina është aktiv në Shqipëri vetëm nëpërmjet një distributori Kosmonte Foods Tirana SHPK.

Balfin - Balkan Finance Investment Group SHPK (Balfin SHPK) është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti: investimin në instrument financiar (të cilët përfshijnë pa kufizime titujt e pjesëmarrjes në kapitalin e shoqërive tregtare, titujt e borxhit, aksionet ose kuotat në fonde investimesh etj), investimin në pasuri të paluajtshme dhe në asete (të prekshme apo të paprekshme), ofrimin e shërbimeve të konsulencës për shoqëritë e kontrolluara prej saj dhe/ose nga të tretë (të cilët përfshijnë pa kufizime konsulencën e natyrës financiare, manaxheriale, ligjore, IT, zhvillim softwares etj).

Balfin SHPK zotërohet plotësisht nga z. Samir Mane.

Balfin SHPK (përfshirë dhe filialet e tij) është kryesisht aktiv në shitjen me pakicë, pasuri të paluajtshme, menaxhim asetesh, sektorin bankar, sektorin energjetik dhe nuk është aktiv në Shqipëri në tregjet ku operojnë shoqëritë target.

Pala shitëse: z. Hyqmet Driza; z. Sulo Driza dhe z. Besnik Driza, shtetas shqiptar.

Shoqëritë target:

Driza SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti grumbullimin, përpunimin, paketimin dhe depozitim në frigorifer të

artikujve bujqësorë e blegtoralë; rritjen, mbarështimin dhe prodhimin e shpendëve, të produkteve dhe nënprodukteve të tyre brenda dhe jashtë vendit etj. Driza SHPK zotërohet plotësisht nga z. Hyqmet Driza.

Fresh Chicken Albania 2019 SHPK është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti therjen e shpendëve për nevojat e veta dhe për llogari të të tretëve; grumbullimin, përpunimin, paketimin dhe depozitimin në frigorifer të artikujve bujqësorë dhe blegtoralë, të të gjithë llojeve të produkteve të përgatitura ose gjysëm të gatshëm, me origjinë bimore ose shtazore etj. Fresh Chicken Albania 2019 SHPK zotërohet plotësisht nga z. Sulo Driza.

Industria Foragjere (VEAF) SHA është një shoqëri aksionare, e themeluar sipas legjislacionit shqiptar, aktive në ndërtimin e fabrikës së foragjereve, prodhimin dhe tregtimin (shitje me shumicë e pakicë) e foragjereve plotësuese, koncentrate, vitamina etj; tregtimin e lëndëve të para (miell peshku, miell mishi, drithëra, krunde, pite pambuku dhe produkte të tjera të kësaj natyre etj.

Industria Foragjere (VEAF) SHA zotërohet nga z. Hyqmet Driza dhe nga shoqëria Driza SHPK.

Euro Alb 2009 SHPK (Biznesi target) është një shoqëri me përgjegjësi të kufizuar, e themeluar sipas legjislacionit shqiptar, me objekt aktiviteti grumbullimin, përpunimin, arkëtimin dhe depozitimin në frigorifer të artikujve bujqësorë dhe blegtoralë, rritjen dhe mbarështimin e prodhimit të shpendëve, të produkteve dhe të nënprodukteve të tyre me shumicë e pakicë brenda dhe jashtë vendit etj. Euro Alb 2009 SHPK zotërohet plotësisht nga z. Besnik Driza.

II. Përqendrimi

Më datë 08 dhjetor 2023, shoqëritë PERUTNINA PTUJ d.o.o. dhe Balfin - Balkan Finance Investment Group SHPK kanë nënshkruar dokumentin “Marrëveshja e Ortakëve”.

Referuar kësaj marrëveshje, palët do të krijojnë si fillim një ndërmarrje të përbashkët, me funksione të plota, të quajtur Perutnina Ptuj Albania SHPK, e cila do të zotërohet 81% nga PERUTNINA PTUJ d.o.o. dhe 19% nga Balfin SHPK dhe do të kontrollohet në mënyrë të përbashkët nga të dyja shoqëritë.

Më datë 29 dhjetor 2023, shoqëritë PERUTNINA PTUJ d.o.o. dhe Balfin - Balkan Finance Investment Group SHPK (blerësit) dhe z. Hyqmet Driza dhe z. Sulo Driza (shitësit) kanë nënshkruar dokumentin “Marrëveshje për Blerje Aksionesh”, ku blerësit ka rënë dakord të blejnë, nëpërmjet një subjekti për qëllime të veçanta / SPV (nënkupton shoqërinë Perutnina Ptuj Albania SHPK që do të themelohet nga blerësit), 100% të kapitalit të shoqërisë Driza SHPK, 100% të kapitalit të shoqërisë Fresh Chicken Albania 2019 SHPK dhe 100% të kapitalit të shoqërisë Industria Foragjere (VEAF) SHA.

Transferimi i pronësisë së kapitalit do të ndodhë në datën e finalizimit, me kusht që të jenë përmbushur të gjitha kushtet prapaprake, ku përfshihet çdo miratim ose leje e nevojshme lidhur me transaksionin e parashikuar nga kjo Marrëveshje, në lidhje me konkurrencën ose rregullorë të ngjashëm sipas ligjit në fuqi.

Më datë 29 dhjetor 2023, shoqëritë Euro Alb 2009 SHPK (shitësi) dhe PERUTNINA PTUJ d.o.o. dhe Balfin - Balkan Finance Investment Group SHPK (blerësit) kanë nënshkruar dokumentin “Marrëveshja e Transferimit të Biznesit”.

Me anë të kësaj marrëveshje është rënë dakord që blerësit, nëpërmjet shoqërisë Perutnina Ptuj Albania SHPK, do të blejnë një pjesë të aktivitetit/ biznesit të shoqërisë Euro Alb 2009 SHPK.

Sipas Udhëzimit “Mbi kontrollin e përqendrimeve ndërmjet ndërmarrjeve”, pika 1.3 “Objekti i Kontrollit” parashikohet se përftimi i kontrollit mbi asetet mund të konsiderohet një përqendrim, vetëm nëse këto asete përbëjnë ndërmarrjen si një e tërë ose një pjesë të saj, d.m.th. një biznes me një përfaqësim në treg, e cila ka një xhiro vjetore tregu.

Nga vlerësimi i dokumentacionit konstatohet se ortakëria e shoqërisë Euro Alb 2009 SHPK nuk do të ndryshojë, pasi nuk do të ketë transferim kuotash. Pjesa e biznesit që do të transferohet është pjesa më e rëndësishme e veprimtarisë së Euro Alb 2009 SHPK, që përbën një biznes me përfaqësim në treg, e cila krijon xhiro.

Në përfundim të transaksionit të propozuar, shoqëria Perutnina Ptuj Albania SHPK do të zotërojë 100% shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe pjesën e biznesit të shoqërisë Euro Alb 2009 SHPK.

Referuar Udhëzimit “Mbi kontrollin e përqendrimeve ndërmjet ndërmarrjeve” parashikohet se dy ose më shumë transaksione përbëjnë një përqendrim të vetëm nëse ato janë unike në natyrë. Me qëllim që të përcaktohet natyra unike e transaksionit, është e nevojshme që këto transaksione të jenë të ndërvarura, në mënyrë të tillë që një transaksion nuk do të ishte kryer pa tjetrin. Kriteri që përcakton nëse transaksioni është i ndërvarur, kërkon që transaksionet të jenë të lidhura me kusht.

Transaksionet e mësipërme janë unike në natyrë, pasi janë të lidhura me njëra tjetrën dhe janë të kryera nga i njëjti blerës, Perutnina Ptuj Albania SHPK. Këto transaksione janë kushte dhe pasoja të njëri-tjetrit. Marrëveshjet e nënshkruara referojnë njëra-tjetrën në hyrje dhe paraqiten si të ndërlidhura. Marrëveshja për Blerje Aksionesh dhe Marrëveshja për Transferimin e Biznesit të shoqërisë Euro Alb 2009 SHPK, nuk do të përfundojnë pa u marrë miratimet për krijimin e ndërmarrjes së përbashkët.

Referuar dokumentacionit të depozituar, transaksioni i njoftuar është krijimi i një ndërmarrje të përbashkët, me funksione të plota, Perutnina Ptuj Albania SHPK dhe përfitim të kontrollit nga kjo e fundit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesin e shoqërisë Euro Alb 2009 SHPK. Ky transaksion është në përputhje me pikën 2 dhe pikën 3 të nenit 10, nenin 12 të ligjit nr. 9121, datë 28.07.2003, “Për mbrojtjen e konkurrencës” dhe Kapitullit II, pjesa 1.3 “Objekti i kontrollit” dhe pjesa 1.5 “Transaksionet e ndërlidhura”, të Udhëzimit “Mbi kontrollin e përqendrimeve ndërmjet ndërmarrjeve”.

III. Analiza e Konkurrencës

Transaksioni i njoftuar konsiston në krijimin e një ndërmarrje të përbashkët me funksione të plota (JV) Perutnina Ptuj Albania SHPK dhe përfitim të kontrollit nga kjo e fundit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesin e shoqërisë Euro Alb 2009 SHPK.

Grupi Perutnina operon në tregun e shitjes së mishit të shpendëve dhe produkteve të mishit. Grupi Perutnina realizon të ardhura në Shqipëri, nëpërmjet shitjeve përmes një distributori, të cilat për vitin 2023 përfaqësonin më pak se 1% të vlerës totale të shitjeve të mishit të shpendëve dhe produkteve të Grupit Perutnina.

Balfin SHPK nuk është aktiv në Shqipëri në tregjet ku operojnë shoqëritë target. Nëpërmjet filialeve të saj (Spar SHPK dhe Tirana East Gate SHPK) Balfin mund të konsiderohet se vepron në mënyrë të tërthortë në një marrëdhënie vertikale me shoqëritë target.

Shoqëritë Driza SHPK operon kryesisht në tregun e furnizimit me mish të freskët shpendësh; Fresh Chicken Albania 2019 SHPK operon në tregun e rritjes së shpendëve për therje; Industria Foragjere (VEAF) SHA operon në tregun e prodhimit të ushqimit të kafshëve dhe Euro Alb 2009 SHPK operon në tregun e tregimit të artikujve të ndryshëm të konsumit të gjerë.

Nga objekti i aktivitetit të shoqërive target, vihet re se ato janë të lidhura midis tyre në proceset teknologjike, duke qenë pjesë e një zinxhiri, duke filluar nga mbarështimi i shpendëve, rritja e shpendëve për therje, furnizimi me mish të shpendëve dhe produkteve nga mishi i shpendëve, si dhe prodhimi i ushqimit të kafshëve.

Sipas nenit 3, pika 7, të ligjit nr. 9121, datë 28.07.2003 “Për mbrojtjen e konkurrencës”, si edhe Udhëzimit nr.76, datë 07.04.2008 “Për përcaktimin e tregut përkatës”, tregu përkatës i produktit do të konsiderohet tregu i rritjes, mbarështimit dhe furnizimit me mish të shpendëve dhe nënprodukte të mishit të shpendëve, si dhe tregu i prodhimit të ushqimit të kafshëve. Treg përkatës gjeografik do të konsiderohet territori i Republikës së Shqipërisë.

Në tregun e rritjes, mbarështimit dhe furnizimit me mish të shpendëve dhe nënprodukte të mishit të shpendëve, si dhe në tregun e prodhimit të ushqimit të kafshëve nuk ka mbivendosje të aktivitetit të palëve në transaksion, për më tepër tregjet paraqiten me një numër të konsiderueshëm konkurrentësh, duke bërë që konsumatorët të kenë një gamë të gjerë zgjedhjesh.

Pjesët e kombinuara të tregut të shoqërive në tregun shqiptar janë nën 20% dhe kjo përqindje nuk ndryshon pas realizimit të transaksionit.

Transaksioni i propozuar nuk do të rritë fuqinë e tregut të ndonjërës nga palët pjesëmarrëse në transaksion dhe pritet të mos sjell probleme për konkurrencën për sa i përket efekteve horizontale dhe vertikale.

PËR KËTO ARSYE:

Komisioni i Konkurrencës, në bazë të nenit 24, shkronja d dhe nenit 56 pika 1 të ligjit nr. 9121, datë 28.07.2003 “Për mbrojtjen e konkurrencës”,

VENDOSI:

1. Të autorizojë përqendrimin e realizuar nëpërmjet krijimit të një ndërmarrje të përbashkët, me funksione të plota, Perutnina Ptuj Albania SHPK dhe përfimi i kontrollit nga kjo e fundit mbi shoqëritë Driza SHPK, Fresh Chicken Albania 2019 SHPK, Industria Foragjere (VEAF) SHA dhe biznesin e shoqërisë Euro Alb 2009 SHPK.
2. Ngarkohet Sekretari i Përgjithshëm për njoftimin e palëve dhe dërgimin e vendimit pasi të bëhen pagesat që parashikon rregullorja “Për caktimin e shpenzimeve për ndjekjen e procedurave pranë Autoritetit të Konkurrencës”.

Ky vendim hyn në fuqi menjëherë.


KOMISIONI I KONKURENCËS

Leida MATJA

Zv/Kryetar

Rezana KONOMI

Anëtar

Adriana BERBERI

Anëtar

Durim KRAJA

Anëtar

Denar BIBA

Kryetar

